

FAHAMAN DAN AJARAN HIZBUT TAHRIR



ENAKMEN MUFTI DAN FATWA (KEDAH DARUL AMAN) 2008 PEMBERITAHUAN FATWA DI BAWAH SEKSYEN 24

FAHAMAN DAN AJARAN HIZBUT TAHRIR

Pada menjalankan kuasa yang diberikan oleh seksyen 24, Enakmen Mufti dan Fatwa (Kedah Darul Aman) 2008 [*Enakmen No. 10 Tahun 2008*]; dan atas titah perintah Kebawah Duli Yang Maha Mulia Sultan Negeri Kedah Darul Aman dengan ini menyiarkan fatwa seperti dinyatakan dalam Jadual.

JADUAL

Berdasarkan keputusan Mesyuarat Jawatankuasa Fatwa Negeri Kedah Darul Aman pada 13 Disember 2020, inilah fatwa untuk diguna pakai di Negeri Kedah Darul Aman seperti berikut:

1. Fahaman dan ajaran Hizbut Tahrir adalah bercanggah dan menyeleweng daripada pegangan Ahli Sunnah Wal Jamaah yang menjadi teras pegangan masyarakat Islam. Fahaman dan ajaran ini perlu disekat keseluruhannya daripada berkembang di negeri ini berdasarkan percanggahan yang terdapat di dalam fahaman dan ajaran tersebut meliputi beberapa perkara berikut:

- i. Berpegang dengan fahaman yang tidak selari dengan aqidah Ahli Sunnah Wal Jamaah seperti Mu'tazilah, Qadariyah dan Khawarij;
- ii. Menafikan konsep al-Qadha' wa al Qadr (القضاء والقدر);

- iii. Berpegang hanya kepada sistem khilafah berdasarkan tafsiran dan fahaman mereka serta menolak dan mengkafirkan sistem demokrasi berparlimen seperti yang diamalkan oleh negara ini; atau
 - iv. Mendakwa semua negara Islam adalah negara kafir kerana berhubung dengan sistem pemerintahan yang tidak berlandaskan undang-undang Islam sepenuhnya.
2. Oleh itu, mana-mana orang Islam sama ada secara individu atau berkumpulan adalah dilarang dan diharamkan berpegang dengan fahaman dan ajaran Hizbut Tahrir termasuklah;
- i. Menjadi ahli kumpulan Hizbut Tahrir;
 - ii. Mengisytiharkan diri sebagai ahli kumpulan Hizbut Tahrir melalui pengakuan bersumpah atau apa-apa kaedah lain;
 - iii. Berada di dalam majlis, perayaan atau sambutan keraian apa-apa program yang boleh dikaitkan dengan fahaman dan ajaran Hizbut Tahrir;
 - iv. Berselindung di sebalik apa-apa aktiviti ekonomi, perniagaan, pendidikan, kesenian dan sebagainya melalui pertubuhan, persatuan atau syarikat yang mempunyai unsur-unsur persamaan dengan fahaman dan ajaran Hizbut Tahrir;
 - v. Memiliki, menyimpan, mencetak, menerbit, memuat naik (*upload*), memuat turun (*download*), menjual, mengedar atau menggunakan apa-apa terbitan risalah, majalah, buku, media sosial, dokumen, rakaman audio, filem atau menggunakan sebarang bentuk lambang, rajah, tanda-tanda yang boleh dikaitkan dengan Hizbut Tahrir;
 - vi. Menghidupkan kembali fahaman dan ajaran Hizbut Tahrir sama ada melalui pertubuhan, persatuan, syarikat, apa-apa rangkaian, mana-mana pertubuhan atau persatuan yang mempunyai unsur-unsur persamaan dengan fahaman dan ajaran Hizbut Tahrir;

- vii. Mengajar, menyebar, menghidup, membantu, menganjur, mempromosi fahaman dan ajaran, menghadiri apa-apa aktiviti atau program atau menyokong apa-apa aktiviti secara langsung atau tidak langsung yang berkaitan dengan Hizbut Tahrir;
- viii. Memiliki, menyimpan, mencetak, menjual atau mengedar filem, rakaman audio, risalah, buku, majalah atau apa-apa terbitan, risalah atau apa-apa dokumen, atau menggunakan sebarang bentuk lambang, rajah atau tanda-tanda yang boleh mengaitkan fahaman dan ajaran Hizbut Tahrir di mana-mana harta alih atau tak alih; atau
- ix. Mengamalkan, menyebarkan dan mengembangkan fahaman dan ajaran Hizbut Tahrir di Negeri Kedah.

3. Mana-mana orang Islam yang telah berbai'ah atau mengamalkan fahaman dan ajaran Hizbut Tahrir adalah disifatkan bercanggah dengan ajaran Islam yang sebenar dan hendaklah segera bertaubat serta memohon keampunan kepada Allah S.W.T.

4. Kesalahan;

Mana-mana orang yang tidak mematuhi perkara 2(i), (ii), (iii), (iv), (v), (vi), (vii), (viii) dan (ix) di atas adalah menjadi suatu kesalahan melanggar fatwa.

[(73) dlm.JMNK(F)603 Jld. 2; PUN(KD) 600-1/5/3(4)]

Tarikh Warta : 1 April 2021

Tarikh Keputusan : 13 Disember 2020